

Transkript sa konferencije za medije međunarodnih organizacija

Mario Brkić, OHR

Mersiha Čaušević-Podžić, OSCE

Jem Thomas, EUFOR

OHR

Ključna sedmica: Podrška parlamentaraca znači otvaranje puta ka Evropi

Imate informaciju da će Zastupnički dom Federacije BiH danas raspravljati o Sporazumu o reformi policije koji je prošle sedmice usvojila Narodna skupština Republike Srpske. Dom naroda Federacije BiH će o Sporazumu raspravljati sutra, a Parlamentarna skupština BiH će o njemu raspravljati u petak.

Ovo znači da bi do kraja ove sedmice parlamentarci mogli osigurati dalje napredovanje Bosne i Hercegovine na putu ka članstvu u EU.

Sada parlamentarci odmah moraju usvojiti tekst Sporazuma u postojećoj verziji, bez amandmana. Procedure Evropske komisije zahtijevaju određeni vremenski period u kojem će se pripremiti pozitivna preporuka Vijeću Evrope. Dakle, ukoliko Bosna i Hercegovina želi da do kraja ove godine započne pregovore o Sporazumu o stabilizaciji i pridruživanju, parlamentarci ovaj Sporazum o reformi policije moraju usvojiti u toku ove sedmice.

Treba biti sasvim jasno da će ovaj Sporazum građanima Bosne i Hercegovine osigurati policijske snage koje su zasnovane na tri principa Evropske komisije:

- Nema političkog uplitanja u rad policije.
- Sve zakonodavne i budžetske nadležnosti za sva pitanja policije moraju se nalaziti na državnom nivou.
- Funkcionalne lokalne policijske oblasti moraju se utvrditi na osnovu tehničkih kriterija za rad policije, pri čemu se operativna komanda provodi na lokalnom nivou.

To znači da će postojati samo jedno ministarstvo unutrašnjih poslova na državnom nivou, bez ministarstava na nižim nivoima i policijske regije će se zasnivati na tehničkim, a ne političkim kriterijima, i gdje to bude neophodno mogu prelaziti međuentitetsku liniju razgraničenja.

OHR poziva parlamentarce da podrže ovaj Sporazum i otvore put za pokretanje pregovora o potpisivanju Sporazuma o stabilizaciji i pridruživanju u cilju uspostave sistema modernih, demokratskih i efikasnih policijskih snaga u BiH.

Vlada RS odgovorna za provođenje Odluke o dekanu Lukiću

Uprkos pozitivnijim izjavama koje je uputila Vlada RS u pismu upućenom 7. oktobra, OHR-u je potreban dokaz o implementaciji. Osnovna odgovornost za ovo i dalje je na Ministarstvu obrazovanja RS i Vladi RS, i ove institucije još nisu poduzele konkretne mjere.

Potrebna je apsolutno puna realizacija Odluke OHR-a, a Vlada RS ima razne opcije na raspolaganju da je postigne.

Univerziteti su javne institucije i moraju podržavati vladavinu zakona. Autonomija je privilegija koja se mora realizirati unutar zakona; ona nije dozvola za kršenje zakona. Inače imamo kaos. Profesor prava ovo mora znati.

Ovim se ne želi odlučiti o tome ko može biti univerzitetski profesor, niti se žele oduzeti prava na rad. G. Lukić može biti profesor na univerzitetima koji nisu javni ukoliko to želi, ali ne na javnom univerzitetu koji se finansira novcem poreskih obveznika.

Kao profesor prava on bi trebao poznavati položaj i odnos odluka Visokog predstavnika u pravnom okviru BiH.

I ono što je najvažnije, mi očekujemo da Vlada RS i Ministarstvo obrazovanja zaštite studente i osiguraju da se zbog ove situacije i nezakonitog održavanja nastave od strane g. Lukića ne derogiraju obrazovna prava i privilegije studenata i osujeti njihova akademska budućnost.

OSCE

Nije bilo izjava.

EUFOR

Pripadnici EUFOR-a su dali doprinos operacijama izvedenim u području Banja Luke u nedjelju i ponedjeljak ujutro, s ciljem razbijanja organiziranih kriminalnih mreža koje pružaju podršku aktivnostima lica optuženih za ratne zločine. Mediji su već izvijestili o ovim operacijama.

Ipak je potrebno naglasiti da su ove operacije naredili i njima upravljali lokalni organi reda i zakona iz Republike Srpske, a EUFOR je pružio pomoć u vidu dodatnog osiguranja na njihov zahtjev, a ne obratno.

EUFOR je impresioniran profesionalnošću i koordinacijom koje je policija Republike Srpske demonstrirala kroz cijelo trajanje operacija. Bilo nam je zadovoljstvo dati doprinos operacijama policije Republike Srpske i unaprijed se radujemo prilici da ponovo sarađujemo s njima.

Organizirani kriminal i njegova kontinuirana podrška licima optuženim za ratne zločine predstavljaju veliku prijetnju za budućnost ove zemlje. EUFOR pozdravlja intenzivna nastojanja organa vlasti širom zemlje da ovoj pošasti stanu u kraj. Ovakve operacije znak su njihove i EUFOR-ove odlučnosti da

razbiju i unište ove mreže.

EUFOR ovim putem potvrđuje da će general-major David Leakey okončati svoju dužnost na mjestu komandanta EUFOR-a početkom decembra. Komandu nad EUFOR-om će predati general-majoru Gian Marcu Chiariniju iz Vojske Italije na ceremoniji planiranoj za 6. decembar 2005. godine.

Dodatne pojedinosti o ceremoniji primopredaje, kao i potpunu biografiju general-majora Chiarinija, objavit ćemo u dogledno vrijeme.

Pitanja novinara:

Zorica Ruļj, RTRS

Možete li komentarisati najave stranaka iz Republike Srpske da neće podržati budžet u Parlamentu ukoliko ne bude uvrštena stavka o popisu stanovništva?

OHR:

Da. Pitanje cenzusa, odnosno popisa, to smo već ranije govorili, je stvar za bosansko-hercegovačke vlasti. Oni bi u ovome slučaju trebali imati na umu par stvari, a to je: ogromni troškovi koji idu uz ovo i potrebno vrijeme koje je tu implicitno da se to sve sprovede i organizira. Također vlasti bi trebali riješiti pitanje i adekvatnosti, odnosno neadekvatnosti statističkog sistema, odnosno prikupljanja informacija u statističkom sistemu, što je ujedno jedan i od zahtjeva studije izvodljivosti prema Bosni i Hercegovini. Zakon o statistici Bosne i Hercegovine je usvojen od strane BiH parlamenta još u četvrtom mjesecu, ali još nije implementiran zbog odbijanja Republike Srpske, odnosno Agencije Republike Srpske da ovo uvede u sistem.